

Ս. ՍՏԵՓԱՆՈՍ ՆԱԽԱՎԱԿՎՅԻ
ՍԱՍՈՒՆՔՆԵՐԻ ՊԱՇՏԱՍՈՒՆՔԻ ՁԵԼՎՈՐՈՒՄԸ¹

Նահատակված սրբոց մասունքների գյուտը մեծ իրադարձություն է: Այդ մասին պատմություններն ու ավանդազրույցները երբեմն հյուսվել են հավատքի նվիրյալի վախճանից անմիջապես հետո, վկայվել գրավոր հուշարձաններով: Հայտնաբերված եւ պաշտամունքի առարկա դարձած բազմաթիվ մասունքների շարքում Սուրբ Ստեփանոսի նշխարներն առանձնանում էին իրենց բացառիկ ազդեցությամբ: Նահատակի պաշտամունքի լայն տարածումը դեռեւս մինչեւ 415 թ. ձեւավորել էր մի հանրային-կրոնական միջավայր, որը ոչ միայն նպաստեց մասունքների գյուտի վերաբերյալ բարի լուրի լայն արձագանքին, այլեւ հիմք հանդիսացավ դրանց հանդեպ առանձնակի նախանձախնդիր վերաբերմունքի ձեւավորման համար²: Սրբազան մասունքների առկայությունը որեւէ եկեղեցում էապես խթանում էր ուխտավորների հոսքը՝ դրանով իսկ բարձրացնելով հոգեւոր հաստատության հեղինակությունն ու ազդեցությունը: Սա հանգեցնում էր միջեկեղեցական յուրօրինակ մրցակցության, ինչով էլ պայմանավորված էր մասունքների գյուտի վերաբերյալ լուրերի արագ տարածումը: Սուրբ Ստեփանոսի նշխարները գրեթե անմիջապես մասնատվեցին եւ տարածվեցին Միջերկրածովյան ավազանի քրիստոնյա հավատացյալների շրջանում³: Մասունքների տարածումը հանգեցրեց Սուրբ Ստեփանոսի համընդհանուր պաշտամունքի փոփոխության՝ այն հարստացնելով նյութական եւ ծիսակարգային նոր տարրերով: Այս գործընթացը նոր լիցք հաղորդեց նահատակի կերպարի շուրջ ձեւավորված կրո-

¹ Ստացվել է՝ 16.10.2025, գրախոսվել է՝ 21.10.2025: էլ. հասցե՝ lian19921992@mail.ru:

² R. Wiśniewski, The Beginning of the Cult of Relics. Oxford: Oxford University Press, 2019, էջ 105

³ «Ստեփանոսի մասունքները սկսեցին ճանապարհորդել իրենց հայտնաբերումից գրեթե անմիջապես հետո, սկզբում Հյուսիսային Աֆրիկա եւ Մինորկա, իսկ մի քանի տարի անց՝ Կոստանդնուպոլիս» (Severus of Minorca: Letter on the Conversion of the Jews. edited and translated by Scott Bradbury, Oxford Early Christian Texts. Oxford: Clarendon, 1996., էջ 23):

նական ընկալումներին՝ առավել խորացնելով դրա հանդեպ եղած հետաքրքրությունն ու հոգևոր եռանդը:

Սուրբ Ստեփանոսի մասունքների գյուտի վերաբերյալ վկայությունը տարածվել է Երուսաղեմի Հովհաննես եպիսկոպոսի հեղինակած Սուրբ Ստեփանոսի հայտնությունը⁴ աշխատության միջոցով: Այն իրենից ներկայացնում է շրջաբերական նամակ՝ ուղղված «Հիսուս Քրիստոսի բոլոր սուրբ եկեղեցիներին»: Փաստաթղթի հիմնական նպատակն էր հրապարակայնացնել նահատակի մասունքների հայտնաբերման փաստը եւ վավերացնել դրանց սրբադասումը (կանոնացումը) քրիստոնեական աշխարհում⁵: Հայտնությունը Սուրբ Ստեփանոսին ներկայացնում է որպես Երուսաղեմի առանձնահատուկ հովանավոր, ինչը միաժամանակ հիմնավորում է քաղաքի եւ նրա գահակալ եպիսկոպոսի բացառիկ կարգավիճակը: Գրության մեջ Երուսաղեմի եպիսկոպոսը դիտարկվում է որպես Սուրբ Ստեփանոսի հրաշագործ գործության միակ միջնորդը՝ «այն լիազորված անձը», որին վերապահված է նահատակի մասունքների գյուտի եւ դրանց միջոցով տիեզերական եկեղեցուն սպասավորելու առաքելությունը: Աշխատությունն ընդգծում է Երուսաղեմի՝ որպես մասունքների նախասահմանված հանգրվանի նշանակությունը՝ քաղաքը դիտարկելով որպես այդ սրբազան գործության հաղորդման բացառիկ կենտրոն⁶: Արդյունքում, վերաձեւվում է աստվածաշնչյան Ստեփանոսի կերպարը՝ նրան ներկայացնելով որպես «անտեսանելի, երկնային հովանավոր»⁷, որի երկրային ստվերն է եպիսկոպոսը, որ մասունքների միջոցով պետք է սուրբի հրաշագործ գործությունը բաշխի ողջ աշխարհին⁸:

Ինչպես նկատում է Փիթեր Բրաունը, «Հայտնություն» առանցքային գաղափարն այն համոզմունքն է, որ մասունքների գյուտը հանգեցնում է «կատարյալ ազատագրման ու թողություն» եւ խորհրդանշում է «խոնարհության պահեր»: Սա հատկապես արտահայտվում է նրանում, որ մասունքների առկայությունն ստեղծում է նոր հնարավորություն-

⁴ Տե՛ս «Revelatio Sancti Stephani»:

⁵ Տե՛ս S. VANDERLINDEN, “Revelatio Sancti Stephani”, 1946, էջ 190:

⁶ Թե՛եւ այդ ուժը գործում է աշխարհում, այն միավորում է երկրային համայնքները Աստծո ներքո մեկ քրիստոնեական համայնքում, որի մուտքի կետը երկրի վրա նահատակի գերեզմանն է» (M. ROBERTS, Cult of the Martyrs, Michigan, 1993, էջ 27–28):

⁷ Պատրոնոս:

⁸ Տե՛ս P. BROWN, The Cult of the Saints: Its Rise and Function in Latin Christianity, 2nd ed. Chicago: University of Chicago Press, 2015, էջ 38:

ներ՝ ուղղակի հաղորդակցություն հաստատելու նահատակի սրբազան զորություն հետ⁹: Հայտնություն երկու խմբագրությունն էլ շեշտադրում են այս հանգամանքը՝ դա դիտարկելով մասունքների գյուտի պատմական եւ հոգեւոր համապատկերում: Յուրաքանչյուր տարբերակում գյուտը ներկայացվում է որպես մարդկության համար օրհասական ժամանակաշրջանում տեղի ունեցած իրադարձություն: Ըստ հեղինակների՝ մարդկային մեղքերի ծայրահեղ աճը հանգեցրել էր համաշխարհային երաշտի, որն սպառնում էր կործանել կյանքը: Այս ճգնաժամային իրավիճակում Սուրբ Ստեփանոսի մասունքների հայտնությունը դիտվում է որպես աստվածային զորությամբ օժտված միակ ընծա, որ ի զորու է կանխելու մոտալուտ աղետը եւ ապահովելու սուրբի հրաշագործ միջնորդությունը¹⁰:

Սույն պատումի առանցքային գործող անձը Լուկիանոս երեցն է, որը, ըստ Ա. եւ Բ. խմբագրությունների, երեք հաշորդական տեսիլքների միջոցով իրազեկվում է Սուրբ Ստեփանոսի նշխարների գտնվելու վայրի մասին: Համաձայն Ա. տարբերակի՝ առաջին հայտնությունը տեղի է ունեցել 415 թ. դեկտեմբերի 3-ին՝ «գիշերվա երրորդ ժամին»: Այս հանգամանքը Լուկիանոսին վերապահում է սրբազան գաղտնիքի առաջնային կրողի եւ միջնորդի դերը, ինչը վճռորոշ նշանակություն ունի մասունքների գյուտի վավերականացման գործընթացում¹¹: Եւ ահա նիրհելու ընթացքում Լուկիանոսին հայտնվում է մի տարեց կերպար՝ օժտված «քահանայական արժանապատվությամբ»: Նկարագրության մեջ շեշտվում են նրա խորհրդանշական հատկանիշները, երկար մորուքը, ձեռքի ոսկե գավազանը եւ ոսկեկերտ խաչերով զարդարված սպիտակ հանդերձը: Այս պատկերագրական մանրամասները միտված են ընդգծելու հայտնվող անձնավորության բարձր հոգեւոր կարգավիճակն ու հեղինակությունը՝ նրան ներկայացնելով որպես երկնային պատգամաբեր¹²: Երեք անգամ իր գավազանով Լուկիանոսին դիպչելուց հետո՝ «ծերունին» կանչում է. «Լուկիանոս, Լուկիան ... Գնա՛ այն քաղաքը, որը կոչվում է Աելիա, այսինքն՝ Երուսաղեմ, որտեղի եպիսկոպոսն է սուրբ

⁹ Տե՛ս P. BROWN, *Cult of the Saints*, էջ 92:

¹⁰ Տե՛ս VANDERLINDEN, նշ. աշխ., էջ 203, 207 եւ Բ., էջ 18, 26:

¹¹ Անդ, էջ 192, 193, Բ.-ն եւս հաստատում է շաբաթվա նույն օրը (ուրբաթ) եւ ժամը, սակայն չի նշում ամսաթիվը կամ տարին:

¹² Տե՛ս VANDERLINDEN, նշ. աշխ., Ա., էջ 194:

Հովհաննեսը: Ասա՛ նրան, «Փռլթո՛վ բաց արա մեր տապանը, որտեղ մեր մասունքներն անտարբերության են մատնված: Մեր միջոցով Աստված, Քրիստոսն ու Սուրբ Հոգին կբացեն իրենց ողորմության դուռը այս աշխարհում, քանզի աշխարհը վտանգի մեջ է ամենօրյա բազմաթիվ մեղքերի պատճառով»¹³:

Տեսիլքի «ծերունին» նույնացվում է պատմական Գամաղիելի հետ, որը, համաձայն Նոր Կտակարանի, Երուսաղեմում եղել է Պողոս առաքյալի ուսուցիչը (հմմտ. Գործք ԻԲ. 3): Սրբախոսական այս ավանդության մեջ նա պատկերվում է որպես քրիստոնեական մկրտություն ընդունած անձ, ինչը նրան տալիս է առանձնահատուկ հեղինակություն՝ որպես հուդայականության եւ քրիստոնեության միջեւ կապող օղակ եւ սրբազան մասունքների պահապան¹⁴: Ծերունին նպատակաուղղված կերպով շեղում է Հուկիանոսի ուշադրությունը սեփական անձից եւ թաղման վայրից՝ սահմանելով հստակ սրբաբանական առաջնահերթություններ: Նա նշում է, որ իր հետ թաղված են անձինք, որոնք «առավել արժանի են մեծարման», հատկապես՝ «իմ տեր Ստեփանոսը, որին քարկոծեցին Երուսաղեմի քահանայապետներն ու հրեաները»: Այս ձեւակերպմամբ բնագիրը հաստատում է Սուրբ Ստեփանոսի նախապատվությունը, եւ նրա բացառիկ դիրքը նահատակների շարքում՝ միաժամանակ ընդգծելով Գամաղիելի դերը՝ որպես նախավկայի պաշտամունքի վկայողի եւ միջնորդի¹⁵: Գամաղիելը գիշերը կազմակերպում է մարմնի տեղափոխումը Կեփար Գամալայում (Գեւղն Գամաղիէլի) գտնվող իր անձնական կալվածք, որտեղ քառասուն օրվա սուգից հետո թաղում է¹⁶: Տեսիլքի ավարտին Գամաղիելը մատնանշում է գերեզմանում ամփոփված եւս երկու անձի՝ Նիկողեմոսին եւ նրա որդուն՝ Աբիբասին: Պատումը Նիկողեմոսին ներկայացնում է որպես մի անձի, որին հրեաները հալածել էին քրիստոնեական մկրտություն ստանալու պատճառով, իսկ Աբիբասին բնութագրում է որպես հավատքի նվիրյալ հետեւորդ: Այս կերպարների ներառումը պատումի մեջ միտված է ընդգծելու Կեփար-Գամալայի գերեզմանատան՝ որպես նվիրական անձանց միասնական հանգստարանի նշանակությունը, որտեղ Սուրբ Ստե-

¹³ Տե՛ս VANDERLINDEN, նշ. աշխ., էջ 192:

¹⁴ Տե՛ս VANDERLINDEN, նշ. աշխ., Ա., էջ 198–199, Բ., էջ 199:

¹⁵ Տե՛ս VANDERLINDEN, նշ. աշխ., Ա., էջ 195, Բ., էջ 195:

¹⁶ Տե՛ս VANDERLINDEN, նշ. աշխ., Ա., 11 (“et poni eum in meo monumento novo”) եւ Բ., էջ 196 (“et deponite eum in monumento meo novo”):

փանոսի նշխարներն զբաղեցնում են կենտրոնական դիրք¹⁷: Գամաղիելը նաեւ ցույց է տալիս տապանի գտնվելու վայրը. ըստ նրա մասունքները գտնվում են մերձակա դաշտում, որը կոչվում է «Ռեւագաբրի», եւ այն լատիներենով բացատրում է որպես («Աստծու մարդկանց»)՝¹⁸:

Արթնանալով, Լուկիանոսը վախի ու անորոշուծյան մեջ աղոթում է՝ սպասելով, որ տեսիլքը կրկնվի երկրորդ եւ երրորդ անգամ, որպեսզի ապացուցվի, որ առաջինը պատրանք չէր: Հաջորդ ուրբաթ՝ դեկտեմբերի 10-ին, գիշերվա նույն ժամին, ինչպես նախորդում, Գամաղիելը հայտնվում է քահանային՝ կշտամբելով նրան իր թերահավատուծյան եւ անգործուծյան համար: Գամաղիելը Լուկիանոսին ներկայացնում է տեսիլք՝ բացահայտելով դամբարանի մարմինների դասավորուծյունը: Բ. տարբերակում Ստեփանոսի թաղման արկղը մյուսներից տարբերվում է «ամենագեղեցիկ վարդերի» առատուծյամբ, որոնք «հորդում են» տապանից դուրս¹⁹:

Լուկիանոսն աղոթում եւ ծոմ է պահում եւս յոթ օր՝ վերջին մի տեսիլք աղերսելով: Ի վերջո, ամսվա երրորդ ուրբաթ օրը՝ դեկտեմբերի 17-ին, գայրուծյով լցված Գամաղիելը վերջին անգամ է հայտնվում քահանային²⁰: Բ. տարբերակում այն պնդումն է, թե տեսիլքներին ուշադրուծյուն չդարձնելով՝ Լուկիանոսը երկարացրել է աշխարհի տառապանքը²¹: Երագից արթնանալով՝ Լուկիանոսը վերջապես կատարում է հանձնարարվածը եւ պատմում է տեսիլքները Հովհաննես եպիսկոպոսին ու հոգեւորականներին: Հովհաննեսի ժամանումից հետո թաղման արկղերը բացվում են, եւ տարածվում է գերբնական մի բուրմունք, այսպես կոչված «բոյրն սրբութեան»: Հետեւում են բժշկուծյուններ²², որոնք հավաքված ամբոխի համար

¹⁷ Sés VANDERLINDEN, նշ. աշխ., էջ 200–201:

¹⁸ Sés «Virorum Dei», VANDERLINDEN, նշ. աշխ., էջ 201:

¹⁹ Sés VANDERLINDEN, նշ. աշխ., Բ., էջ 201:

²⁰ Sés VANDERLINDEN, նշ. աշխ., Ա., էջ 206:

²¹ Sés VANDERLINDEN, նշ. աշխ., Բ., էջ 207:

²² Sés H. MÉNDEZ, The Cult of Stephen in Jerusalem: Inventing a Patron Martyr, Oxford, 2023, էջ 227–229:

Շատ մարդիկ եկան Երուսաղեմից եւ շրջակա գյուղերից: Եկածների մեջ կային տարբեր հիվանդուծյուններից տառապողներ՝ կույրեր, հաշմանդամներ, դիվահարվածներ, մարմինները լեցուն վարակներով ու խոցերով, եւ նրանք բոլորը բժշկվեցին: Բժշկվածների թիվը հասնում էր յոթանասուն երեքի: Այդպես, վերցնելով շոր սրբերի մասունքները, սաղմոսների եւ ալ սուրբ երգերի երգեցողուծյամբ տեղափոխեցին եւ դրեցին Սիոնի սուրբ եկեղեցում: Жития святых по изложению свт. Димитрия Ростовского, Перенесение мощей святого Первомученика и Архидиакона, 2023, էջ 9

հաստատում են գտածոյի իսկությունն ու նշանակությունը²³: Ա. տարբերակում նախատեսվում է Ստեփանոսի մասունքները տեղափոխել²⁴: Դատեղի է ունենում մի քանի օր անց՝ դեկտեմբերի 26-ին: Եւ Ա. եւ Բ. դեպքերում սրբության բուլրի տարածումը եւ հաջորդող բժշկությունները կապված են հատկապես Ստեփանոսի մասունքների հայտնաբերման հետ²⁵:

Բազմաթիվ այլ զորություններից հետո Սուրբ Ստեփանոսը գովաբանվում է նաեւ մարդկանց երաշտից ազատելու համար²⁶:

Բերքն ու բարեբերությունը հովանավորելու նրա զորության արձագանքն է լեհական ժողովրդական սովորույթներից հայտնի օրինակը: Դեկտեմբերի 26-ին Ս. Ստեփանոսի տոնին, հավատացյալները վարսակ էին բերում նրա անունը կրող եկեղեցիներ, պատարագի վերջում քահանաներն օրհնում էին սերմերը՝ խնդրելով սուրբին, որ «առատ բերքի զորություն շնորհի սերմերին»²⁷: Ծեսն առավել տպավորիչ դարձնելու նպատակով եկեղեցու վերնատնից (երգչախմբի համար նախատեսված հատվածից) քահանայի եւ հավատացյալների վրա սիսեռի կամ լոբու հատիկների հետ խառնած վարսակ էին շաղ տալիս: Այս համադրությունը պատահական չէր. ավելի ծանր հատիկների հավելումը նպատակ ուներ մեծացնելու հարվածի զգացողությունը՝ խորհրդանշական կերպով վերակենդանացնելով Նախավկայի քարկոծման տեսարանն ու նահատակության հիշողությունը: Այսպիսով հարվածի ուժն ու սերմերի տարափը խորհրդանշում էին սուրբի շարչարանքների պատմությունը: Այս սովորույթը գործել է մինչեւ 1960-ական թթ.²⁸: Եկեղեցում վարսակի օրհնությունը պահպանվել է մինչ օրս, սակայն «հատիկով» միմյանց ցողելու ծեսը վերանում է: Ժողովրդական համոզմունքների համաձայն, օրհնված վարսակը ձեռք է բերել հատուկ ուժ եւ օգտագործվել ոչ միայն որպես սերմ, այլեւ որպես սնունդ եւ դեղամիջոց կենդանիների համար: Օրհնած վարսակը տուն էին տանում եւ

²³ Տե՛ս VANDERLINDEN, նշ. աշխ., Ա., էջ 214:

²⁴ Տե՛ս VANDERLINDEN, նշ. աշխ., Ա., էջ 214:

²⁵ Ա.-ում սրբության հոտն ազատվում է հենց այն ժամանակ, երբ բացվում է Ստեփանոսի թաղման տարան [VANDERLINDEN, նշ. աշխ., 214]: Բ.-ում այն ազատ է արձակվում, երբ Ստեփանոսի մասունքները հայտնաբերվում են գերեզմանի արեւելյան մասում՝ առաջացնելով երկրաշարժ: Բ.-ն Ա.-ից տարբերվում է նաեւ նրանով, որ տեքստում պատմված բոլոր հրաշքները ուղղակիորեն կապում է հոտի հետ: VANDERLINDEN, նշ. աշխ., էջ 215:

²⁶ Տե՛ս VANDERLINDEN, նշ. աշխ., Ա., էջ 216–217:

²⁷ Տե՛ս Z. KUPISIŃSKI, Dzień świętego Szczepana w religijności i kulturze ludowej w Polsce, Tom LXVI, zeszyt 9 –2019, էջ 127–139:

²⁸ Տե՛ս Z. KUPISIŃSKI, էջ 132:

խառնում գարնանացանի համար նախատեսված հացահատիկի հետ՝ լավ բերք ապահովելու եւ արտը կարկուտից ու բնական աղետներից պաշտպանելու համար: Սուրբ Ստեփանոսի տոնի ժողովրդական ծիսակարգում առանցքային տեղ էր զբաղեցնում հացահատիկի կիրառումը. թե՛ եկեղեցի տանող ճանապարհին, թե՛ պատարագի ավարտին հավատացյալները վարսակ էին շաղ տալիս միմյանց վրա: Այս սովորույթն ուներ նաեւ հանրային հետնախորք. ամուրի երիտասարդներն այն օգտագործում էին որպես սիրո արտահայտման եւ նախընտրելի օրիորդներին ուշադրություն մատուցելու միջոց: Կելցեի²⁹ շրջանի ազգագրական տվյալների համաձայն՝ հագուստի վրա հայտնված հացահատիկի քանակը համարվում էր աղջկա հանրային ընկալման եւ ժողովրդականության յուրօրինակ չափանիշ. առավելագույն քանակությունը վկայում էր համայնքային սիրո մասին, մինչդեռ դրա բացակայությունն ընկալվում էր որպես անտեսվածության նշան³⁰:

Քրիստոնեական հնագիտության եւ վարքաբանության ակնառու հետազոտող Վիկտոր Սաքսերը պատկերավոր կերպով նկարագրում է Սուրբ Ստեփանոսի մասունքների հայտնաբերմամբ ծագած ոգեւորության «մակընթացային ալիքը», որն այդ շրջանում համակել էր ողջ Միջերկրածովյան աշխարհը³¹: Հայտնաբերմանը հաջորդած տասնամյակներում Ստեփանոսի մասունքները «ճանապարհվեցին» այլ տարածաշրջաններ, ընդ որում՝ բոլոր երկրներն ու եկեղեցիներն էին փորձում սրբության նշխար ձեռք բերել:

Աստվածաշնչագետ, Ստեփանոսի մասունքների հայտնության ամենակարեւոր քննական հրատարակություններից մեկի աշխատասիրող էռնստ ֆոն Դոբսչուտզի³² հետազոտությունների շնորհիվ հայտնի է դարձել հետեւյալ պատումը. Սուրբ Ստեփանոսի մասունքները տարվել են Արեւմուտք, եւ դրանցից որոշները տեղափոխվել են Ուզալիս³³ քաղաքի եկե-

²⁹ Պատմական Միջին Ահաստանի (կամ Սվենտոկշիսկյան վոյեւոդության) կենտրոնը: Այս տարածաշրջանը հայտնի է իր հնագույն քրիստոնեական ավանդույթներով եւ ժողովրդական հավատալիքների կայունությամբ:

³⁰ Տե՛ս Z. KUPISIŃSKI, էջ 133:

³¹ Տե՛ս V. SAXER, Morts, martyrs, reliques en Afrique chrétienne aux premiers siècles. Paris: Beauchesne, 1980, էջ 16–25:

³² Տե՛ս E. VON DOBSCHUTZ, Christusbilder; Untersuchungen zur christlichen legend, TU 18; Leipzig Hinrichz, 1899, էջ 35–37):

³³ Ուզալիսը հռոմեական Աֆրիկայի պրովինսուլարիս էր, որը դարձավ քրիստոնեական եպիսկոպոսություն, եւ ընդգրկված էր Կաթոլիկ եկեղեցու տիրոջավոր եպիսկոպոսություն-

ղեցի: Այստեղ Սուրբ Ստեփանոսի մասունքները հանդես են գալիս որպես ապավեն, պաշտպանական միջոց քաղաքի բնակիչներին ահաբեկող սատանայական ուժերի դեմ: Այս դիմակայության արդյունքում արձանագրվում է սուրբի հաղթանակը, որ եւ պատկերագրվում է: Հաջորդ օրը Ուզալիսի Սենոդոն սարկավազը մի անծանոթից ստանում է վարշամակ, որի վրա բազմերանգ ներկերով պատկերված էր նախավկայի հաղթանակը: Սուրբը ներկայացված էր սատանային տապալած դիրքով՝ ուսին կրելով հաղթության խորհրդանիշը՝ խաչը: Ուզալիսի բնակիչների համար այս պատկերը դիտվում էր որպես հրեշտակաստեղծ վավերագիր, որը հաստատում էր սուրբի հովանավոր զորութունը³⁴:

Լատին աղբյուրների քննական վերլուծությանը հայտնի Բոլլանդյան միաբանության անդամ Բոդուեն դե Գաֆիերը վեր է հանել միջնադարյան մի ինքնատիպ ավանդազրույց: Ըստ այդ վեպի՝ դիվային ուժերը առեւանգել են մանուկ Ստեփանոսին՝ նրա փոխարեն թողնելով «փոխնորդ» էակ: Այս դրվագը, որը ներթափանցել է սուրբի վարքաբանական շրջանակ, արտացոլում է միջնադարյան մարդու պատկերացումները սրբության եւ շարիքի մշտական պայքարի մասին, որն սկսվում է դեռեւս օրորոցից³⁵:

Սուրբ Ստեփանոսի պատումին առնչվող մի շարք կարեւոր հատվածներ, որոնք պահպանվել են Երուսաղեմի եպիսկոպոսին վերագրվող ղպտիերեն վավերագրերում³⁶, արժանացել են հայտնի եգիպտագետ-բնագրագետներ Հենրի Մունիեի եւ Ֆրանսուազ Մորարի ուշադրությանը: Նրանց իրականացրած հրատարակությունները հնարավորություն են տալիս վերականգնելու նախավկայի պաշտամունքի տարածման արեւելյան (ղպտիական) ավանդույթը, որն առանձնանում է իր ինքնատիպ մանրամասներով եւ աստվածաբանական շեշտադրումներով: Ֆրանսուազ Մորարը, մանրամասն վերլուծելով վավերագրի բովանդակությունը, մատնանշում է մի ուշագրավ դրվագ. մի մարդ, որը թալանել էր Սուրբ Ստեփանոսի մատուռը, հանկարծակի հի-

ների ցանկում: Այժմ նրա տեղում էլ Ալիան քաղաք եւ կոմունան է՝ Թունիսի Բիզերտե նահանգում:

³⁴ Sks E. VON DOBSCHUTZ, էջ 35- 37:

³⁵ B. DE GAIFFIER, “Le diable voleur d’enfants. A propos de la naissance des saints Étienne, Laurent et Barthélemy,” in Homenaige a Antoni Rubió i Lluch (Miscel·lània d’Estudis literaris, històrics i linguistics, 2; Barcelona: Biblioteca Balmés, 1936, էջ 1–26

³⁶ BHO, 1093:

վանդանում է եւ, գիտակցելով իր արարքի ծանրութիւնը, վերադառնում է նույն սրբավայրը՝ հայցելու նախավկայի բժշկութիւնն ու թողութիւնը: Այս պատումը բացահայտում է սուրբի կերպարի մեկ այլ կարեւոր գործառույթ. նա հանդես է գալիս ոչ միայն որպէս հրաշագործ բժշկող, այլեւ որպէս բարոյական դաստիարակ, որի գորութիւնն ստիպում է հանցագործին աւերեսվել սեփական մեղքին: Սուրբի միջնորդութեամբ տեղի ունեցող բժշկութիւնը տվյալ համապատկերում դիտվում է որպէս աստվածային ողորմութեան դրսեւորում, որը հասանելի է միայն անկեղծ զղջման եւ առ սրբութեանն ուղղված երկյուղածութեան միջոցով: Գիշերվա կեսին կողոպտիչի առջեւ հայտնվում է նախավկա Ստեփանոսը եւ հանդիմանում նրան վատ արարքների համար: Մարդը խոստանում է ապաշխարել եւ այլեւս մեղք չգործել: Ստեփանոսը բժշկում է նրան, ապա վերադառնում է երկինք, իսկ բժշկվածը պատմում է իր տեսիլքը բոլորին: Հատվածն ավարտվում է առաջին նահատակի գովաբանութեամբ, որին հարում են Պետրոսն ու Հովհաննէսը³⁷: Հրատարակված հատվածների համաձայն՝ պատումի առանցքում Իսայանունով վարդապետի տեսիլքն է, որը համայնքին հորդորում է միանալ հավաքական աղոթքին եւ փառաբանել հրեշտակներին ու սուրբերին, մասնավորապէս՝ Ստեփանոսին եւ Հովհաննէսին: Հ. Մունիեի ներկայացրած հաջորդ դրվագները բացահայտում են սուրբին որպէս սրբավայրի անձեռնմխելիութեան պահպան. երբ մի շարագործ փորձում է թալանել մատուռի ոսկյա եւ արծաթյա սպասքը, տունդարձի ճանապարհին նրան է հայտնվում Սուրբ Ստեփանոսը՝ ահազդու ձիավորի կերպարանքով: Այս ինքնատիպ հայտնութիւնն ստիպում է հանցագործին խոստովանել մեղքը՝ ընդգծելով նախավկայի գորութիւնը ոչ միայն որպէս բարեխոսի, այլեւ որպէս երկնային արդարադատութիւն սահմանողի, որն ի վորու է բացահայտել անգամ ամենածածուկ անօրինութիւնը: Գողն առաջարկում է կիսել հափշտակվածը, սակայն Ստեփանոսն ստիպում է նրան մատուռ վերադարձնել ամենը: Գողն օգնութիւն է կանչում, շրջակայքի մարդիկ մոտենում են եւ տեսնում գողին, սակայն ոչ Ստեփանոսին, որը մնում է անտեսանելի: Վերջապէս, երբ գողը զղջալով ապաշխարում է, Ստեփանոսը ներում է նրան եւ

³⁷ Տե՛ս FR. BOVON, The Dossier on Stephen, the Frist Martyr, The Harvard Theological Review Vol. 96, No. 3, Jul., 2003, էջ 307:

ազատում: Իսկ ապաշխարած գողը մնացյալ կյանքը ծառայում է եկեղեցուն՝ որպես սուրբի մատուռի պահապան: Վավերագիրը, ինչպես եւ մյուսը, ավարտվում է Սուրբ Ստեփանոսի գովաբանությամբ³⁸:

Մասունքների ներթափանցումը տարբեր շրջաններ նշանակալի հետք թողեց հատկապես հինգերորդ դարի սրբախոսություն, նյութական մշակույթի, ուխտագնացության օրինակների եւ տեղական հրեաքրիստոնեական հարաբերությունների վրա: Նահատակի մասունքների հայտնաբերումը նշանավորեց նրա տեղական պաշտամունքի զարգացման ավելի աշխույժ փուլի սկիզբը, որի ընթացքում առավել էր բարձրանում Ստեփանոսի հեղինակությունը:

Ինչպես նշում է ժամանակակից կրոնագետ Դեյվիդ Ֆրանկֆուրթերը, Ե. դարում սրբավայրերը, հաճախ վիթխարի բազիլիկների տեսքով, վերածվել էին քաղաքային ինքնության առանցքային խորհրդանիշների՝ վկայելով համայնքի սերտ կապն ու նվիրվածությունն այն երեւելիներին, որոնց ընծայված էին կառույցները: Տաճարներն ու մատուռները մարմնավորում էին տեղական ինքնության հայեցակարգը՝ հստակորեն ընդգծելով այն նվիրյալների շրջանակը, որոնց տվյալ համայնքը մեծարում էր որպես իր բացառիկ երկնային հովանավորների: Սրբավայրը, այսպիսով, դառնում էր յուրօրինակ հոգեւոր կայան, որտեղ քաղաքի հանրային կյանքը սերտաճում էր սրբազան պաշտամունքի հետ, իսկ հավատքի նվիրյալների հարգն ավելի էր մեծանում նրանց սրբավայրերի ճարտարապետական վեհությունը, քաղաքային համապատկերում դրանց կենտրոնական դիրքով եւ նույնիսկ բուն նահատակության տոնից դուրս իրականացվող բազմազան ծիսական կիրառություններով³⁹՝ չխոսելով արդեն քաղաքի իշխանությունների, հոգեւորականների հեղինակության բարձրացման, ուխտավորների քանակի եւ քաղաքի բնակչության բարձրացող ինքնագնահատականի մասին:

Սուրբ Ստեփանոսի մասունքների մեծ մասը տարվել է Երուսաղեմի սուրբ Սիոն եկեղեցի եւ այնտեղից տեղափոխվել Երուսաղեմից հյուսիս գտնվող Ստեփանոսի քարկոծման եկեղեցի: Այդ եկեղեցին հետագայում փոխարինվեց բազիլիկով, որ կառուցեց Եւդոքիա կայսրուհին 460 թ., սա-

³⁸ *Steu* Fr. BOVON, էջ 307–308:

³⁹ *Steu* D. FRANKFURTER, *Christianizing Egypt: Syncretism and Local Worlds in Late Antiquity*. Princeton, NJ: Princeton, 2017, էջ 106:

կայն այն ավելի ուշ ավերվեց: Երբ տաճարի ավերակները 1882 թ. հայտնաբերվեցին, դրանց վրա կառուցվեց ներկայիս Սուրբ Ստեփանոսի բազիլիկը՝ Աստվածաշնչյան դպրոցի հովանավորությամբ: Ըստ եկեղեցական ավանդության՝ Սուրբ Ստեփանոսի նահատակության (քարկոծման) վայրը Երուսաղեմի արեւելյան մասում է՝ Կեդրոնի հովտում, որը գտնվում է Տաճարի լեռան եւ Զիթենյաց լեռան միջեւ: Այս իրադարձության կապակցությամբ Երուսաղեմի Հին քաղաքի արեւելյան դարպասը կոչվել է նաեւ Սուրբ Ստեփանոսի դարպաս, որ սակայն առավել հայտնի է որպես Առյուծների դարպաս⁴⁰: Ներկա տեղագրական կապը պատահական չէ. այն ուխտավորների համար ստեղծում է տեսանելի եւ շոշափելի երթուղի, որը միավորում է սրբի նահատակության վայրը քաղաքի ճարտարապետական կերպարի հետ՝ դարձնելով նրա պաշտամունքը Երուսաղեմի քաղաքային համայնապատկերի անբաժանելի մասը: Սուրբ Ստեփանոսի մասունքների մի մասը 560 թ. տեղափոխվեց Կոստանդնուպոլիս, մյուս մասը՝ Հռոմ՝ Սան Լորենցո եկեղեցի⁴¹, իսկ որոշ մասունքներ տարվեցին այլ եկեղեցիներ, որոնք հետագայում դարձան հայտնի սրբավայրեր: Այդպիսի սրբավայրերից մեկը գտնվում էր Հյուսիսային Աֆրիկայում՝ Հիպպոլում, որտեղ Ս. Օգոստինոսը առանձնակի տարածեց Սուրբ Ստեփանոսի պաշտամունքը եւ պահանջեց, որ հանրային վկայություն տրվի նրա միջոցով կատարված հրաշքների մասին: Նման հրաշագործ սրբավայրեր կային նաեւ Աֆրիկայի այլ տարածքներում, Կալամայում եւ Ուզալիում՝ Ուտիկայի մոտ գտնվող գաղութում⁴², Մինորկա կղզում: Իտալիայի Անկոնա քաղաքի սրբավայրում որպես մասունք պահվում էր մի քար, որը, ըստ ավանդության, օգտագործվել էր նախավկայի քարկոծման ժամանակ: Սուրբ Ստեփանոսի պաշտամունքը լայն տարածում գտավ նաեւ Իտալիայի այլ նշանավոր քաղաքներում. Հռոմում նրան նվիրվեցին մի քանի սրբավայրեր, որոնցից հայտնի են Վիա Լատինայի վրա գտնվող բազիլիկը եւ Կելիան բլրի վրա վեր խոյացող Սանտո Ստեֆանո Ռոտոնդո եկեղեցին: Պաշտամունքային կենտրոններ հիմնվեցին նաեւ Ռավեննայում եւ Նեապոլում: 4-րդ դարի վերջից մինչեւ 5-րդ դարի կեսերը Կոստանդնուպոլսում կառուցվեցին սուրբի անունը կրող երեք

⁴⁰ Հմմտ. ԷՄԲ. ՎՐԳ. ԱԹԱՋԱՆԵԱՆ, Գ. ՄԱԳՈՅԵԱՆ, Երուսաղեմի Հայոց սրբավայրերը, Մոսկուա, 2003, էջ 37:

⁴¹ Իտալերեն՝ Cimitero Monumentale del Verano՝ Հռոմի ամենահայտնի եւ պատմական նշանակություն ունեցող գերեզմանատունը:

⁴² *Տէս* De Civitate Dei 22.8, In Basic Writings of St. Augustine, v. 2, New York, 1948, էջ 625–628:

եկեղեցիներ, ինչը նշանավորեց նրա պաշտամունքի համընդհանուր տարածումը համայն կայսրության տարածքում⁴³:

ԵԶՐԱԿԱՑՈՒԹՅՈՒՆ

Նահատակված սուրբերի մասունքների գյուտը վաղ քրիստոնեական աշխարհի կարեւորագույն հոգեւոր իրադարձություններից էր: Հայտնաբերված բազմաթիվ նշխարների շարքում Սուրբ Ստեփանոս Նախավկայի մասունքներն առանձնանում են իրենց բացառիկ տիեզերական ազդեցությամբ: Թեև սուրբի պաշտամունքը ձեւավորվել էր դեռևս մինչև 415 թվականը (ինչը վկայված է Գրիգոր Նյուսացու եւ Ասթերիոսի քարոզներում), սակայն Լուկիանոս երեցի տեսիլքների միջոցով մասունքների հայտնաբերումը նոր եւ աննախադեպ լիցք հաղորդեց նրա փառքի տարածմանը:

Սուրբ Ստեփանոսի նշխարների հայտնությունը վերաձեւեց աստվածաշնչյան նահատակի կերպարը՝ նրան Երուսաղեմի տեղական մարտիրոսից վերածելով «անտեսանելի երկնային հովանավորի», որի զորությունը մասունքների միջոցով սփռվեց ողջ Միջերկրածովյան ավազանում: Երուսաղեմի Հովհաննես եպիսկոպոսի «Շրջաբերական նամակը» վավերացրեց այս գյուտը՝ Երուսաղեմը հռչակելով սրբազան զորության հաղորդման բացառիկ կենտրոն, իսկ մասունքների առկայությունը եկեղեցիներում դարձավ հոգեւոր հեղինակության եւ ուխտավորների ներգրավման հիմնական գրավականը:

Լուկիանոսի տեսիլքներում Գամաղիելի հայտնությունը եւ տապանների բացման ժամանակ տարածված «բոյրն սրբութեան» ստեղծեցին մի սրբախոսական հիմք, որն ուղեկցվում էր բժշկություններով եւ բնական աղետներից (երաշտից) ազատվելու հրաշքներով: Սուրբի զորության այս ընկալումը հետագայում տեղ գտավ ժողովրդական ծիսակարգերում, ինչպես, օրինակ, լեհական ավանդույթում վարսակի օրհնության եւ միմյանց «քարկոծելու» ինքնատիպ սովորույթի մեջ, որտեղ սուրբը հանդես է գալիս որպես բերքի եւ բարեբերության հովանավոր:

Ինչպես նկատում է Դեյվիդ Ֆրանկֆուրթերը, Ե. դարում Սուրբ Ստեփանոսի անունով կառուցված հոյաշեն բազիլիկները՝ Հռոմից (Սանտո

⁴³ *Steu* The New Catholic Encyclopedia, vol. 13, 2nd ed., Gale, 2003, էջ 509–512:

Ստեֆանոս Ռոտոնդո) մինչև Կոստանդնուպոլիս, Հիպպո եւ Ուզալիս, դարձան քաղաքացիական ինքնության առանցքային խորհրդանիշներ: Սուրբի կերպարը հարստացավ նաեւ բարոյական դաստիարակի եւ արդարագատուծյուն սահմանողի գործառույթներով, ինչը վկայված է ղպտիական վավերագրերում եւ Օգոստինոս Երանելու «Աստծու քաղաքի մասին» աշխատության մեջ:

Ամփոփելով՝ կարող ենք արձանագրել, որ Սուրբ Ստեփանոսի մասունքների գյուտը հանգեցրեց միջնադարյան քրիստոնեական աշխարհի հոգեւոր համապատկերի ամբողջական վերափոխմանը: Նախավկայի պաշտամունքը, միահյուսելով աստվածաբանական վարդապետությունը, ժողովրդական հավատալիքները եւ ճարտարապետական վեհությունը, ստեղծեց մի սրբազան ցանց, որի հետքերն առ այսօր պահպանվում են Երուսաղեմի տեղագրության մեջ, եւրոպական բազմաթիվ բնակավայրերի անվանումներում եւ քրիստոնեական ծիսական կյանքում:

ՀԻՄՆԱԲԱՌԵՐ

Ս. Ստեփանոս Նախավկա, նահատակ, մասունքներ, Լուկիանոս, հրաշագործ սուրբ, ուխտազնացություն:

РЕЗЮМЕ

Формирование культа мощей святого первоученика Стефана неразрывно связано со становлением раннехристианской культуры мученичества. Особый импульс этот процесс получил в V веке – с обретением гробницы святого и последовавшим целенаправленным распространением реликвий. Образу Стефана была обеспечена широкая известность ещё через библейское повествование, проповедническую и агиографическую литературу, что подготовило благодатную духовную и общественную почву для принятия мощей.

Обретение реликвий и их передача различным церквям преобразили само существо почитания святого: молитвенное поминовение обрело новое измерение – религиозного опыта, основанного на непосредственном материальном присутствии святыни. Мощи стали средоточием паломничества, источником

чудотворных преданий и побуждением к возведению новых храмов, неуклонно укрепляя авторитет и духовное влияние принявших их общин.

В итоге культ мощей святого первомученика Стефана занял одно из центральных мест в общехристианской памяти о мучениках, органично соединив историческое предание, освящённую материальность реликвии и живой коллективный религиозный опыт.

SUMMARY

The formation of the cult of Saint Stephen the Protomartyr's relics is closely linked to the development of early Christian martyrdom culture and received a special impetus in the 5th century following the discovery of his tomb and the organized distribution of his relics. Even prior to this, St. Stephen was already widely known thanks to the biblical narrative, homiletic and hagiographic literature, which created a favorable spiritual and social environment for the acceptance of the relics.

The discovery and transfer of relics to various churches transformed St. Stephen's veneration, turning it from simple remembrance into a form of religious experience based on physical presence. The presence of relics contributed to the growth of pilgrimages, spread of stories about miracles, as well as construction of new churches, increasing the authority and spiritual influence of local communities.

As a result, the cult of St. Stephen the Protomartyr's relics became one of the key elements of the pan-Christian remembrance of martyrdom, combining historical memory, material sanctity, and collective religious experience.

